

CONVENIO DE COLABORACIÓN ENTRE A CONSELLERÍA DE EMPREGO E IGUALDADE DA XUNTA DE GALICIA E O COLEXIO PROFESIONAL DE XORNALISTAS DE GALICIA, PARA COLABORAR NA SENSIBILIZACIÓN SOCIAL FRONTE Á VIOLENCIA DE XÉNERO E NA FORMACIÓN DE PROFESIONAIS, NO MARCO DO PACTO DE ESTADO CONTRA A VIOLENCIA DE XÉNERO

MEMORIA EXPLICATIVA

De conformidade co Decreto 215/2020, do 3 de decembro, polo que se establece a estrutura orgánica da Consellería de Emprego e Igualdade, á Secretaría Xeral da Igualdade, como órgano superior da Administración autonómica en materia de igualdade, correspóndelle impulsar as actuacións conducentes á promoción da igualdade e á eliminación da discriminación entre mulleres e homes, así como á eliminación da violencia de xénero nos termos establecidos na Constitución, no Estatuto de autonomía de Galicia, no Decreto legislativo 2/2015, do 12 de febreiro, polo que se aproba o texto refundido das disposicións legais da Comunidade Autónoma de Galicia en materia de igualdade, na Lei 11/2007, do 27 de xullo, galega para a prevención e o tratamento integral da violencia de xénero, e na demais lexislación aplicable na materia.

A Lei 11/2007, do 27 de xullo, galega para a prevención e o tratamento integral da violencia de xénero, recolle a necesidade de velar por un tratamento axeitado da información no referido á violencia de xénero en Galicia, dedicando os seus artigos 9, 10 e 11 ao tratamento da violencia de xénero nos medios de comunicación. Nestes artigos prevese que a Xunta de Galicia garantirá que os medios de comunicación de titularidade pública e aqueles outros nos que participe ou financie, non emitan imaxes ou contidos que resulten contrarios á finalidade e espírito do propio Decreto legislativo 2/2015 do 12 de febreiro.

Ademais, o artigo 6 da mesma Lei 11/2007, establece que o departamento competente en materia de igualdade, en coordinación cos restantes departamentos da Xunta de Galicia, porá en marcha de xeito periódico, campañas de información e sensibilización que teñan como obxectivo mudar os estereotipos sexistas, e que incidan no rexeitamento social sobre todas as formas de violencia de xénero.

O Eixo 1 do Pacto de Estado: “*Ruptura do silencio: sensibilización e prevención*”, no seu apartado 4, recolle medidas dirixidas aos Medios de Comunicación, tales “comprometer aos medios de comunicación a divulgar as sentenzas condenatorias recaídas nos casos de violencia de xénero, co fin de axudar á erradicación de calquera sensación de impiedade respecto dos autores destes crimes” (medida 43), “establecer un acordo marco para a correulación, a especialización e formación de profesionais dos medios de comunicación e publicidade” (medida 46), ou “atender as necesidades informativas da mocidade para frear



condutas machistas que desembocan en malos tratos”, (medida 56), así como a medida 222 “Impulsar a formación especializada en violencia de xénero para os e as profesionais dos medios de comunicación” dentro do seu *Eixo 5 “Impulso da formación que garanta a mellor resposta asistencial”*.

Os medios de comunicación teñen a obriga social de ser unha ferramenta para denunciar a violencia machista, concienciar á sociedade e servir de canle de difusión de mensaxes que contribúan á solución deste grave problema. A formación das e dos profesionais dos medios de comunicación para o exercicio dun xornalismo responsable e con perspectiva de xénero axuda na prevención da violencia de xénero e en última instancia na protección das vítimas. A violencia de xénero forma parte da axenda mediática dende hai xa tempo, sendo necesario incorporar boas prácticas que permitan, tanto a reflexión sobre un problema social de primeira orde, como a erradicación dunha realidade que custa a vida a medio cento de mulleres cada ano en España.

O Colexio Profesional de Xornalistas de Galicia ten entre as funcións recollidas no artigo 3 dos seus Estatutos, as de “exercer cantas funcións lle sexan encomendadas pola Administración e colaborar con ela mediante a relación de estudos, emisión de informes, elaboración de estatísticas e outras actividades relacionadas cos seus fins que poidan serlle solicitadas ou acorden formular por propia iniciativa”, así como as de “organizar cursos para a formación, actividades e servizos comúns profesionais para as persoas colexiadas”.

Por todo o exposto a Consellería de Emprego e Igualdade, a través da Secretaría Xeral da Igualdade, e o Colexio Profesional de Xornalistas de Galicia consideran de interese o establecemento de accións conxuntas de sensibilización e formación en materia de igualdade e de loita contra a violencia de xénero. Con ditas accións cúmprese cun obxectivo de utilidade pública e de interese social, xa que se está a concienciar á sociedade sobre a importancia e necesidade que supón a participación das mulleres en todos os ámbitos, así como tamén de erradicar calquera forma de violencia de xénero.

A secretaria xeral da Igualdade

Susana López Abella

